

En memoria da

## Luis Hendry-Monn

Naschius ils 27 da settember 1921

Morts ils 4 da settember 2010

Avon entgin temps havein nus stuiu prender cumiau da nies car tat da Surrein. Il Luis Hendry lai anavos ina gronda largia e nus essan trests. Tier in aschi car tat denton, prendan las bialas regurdientschas gleiti surmaun e gidan en quei grev temps da cumiau.

Jeu hael passentau bia temps vi Surrein ed aschia viu ed empriu ina massa. Il tat ha adina luvrau e trafficau enzatgei. Aschia sa quei buca esser auter, che entginas da mias pli fermas regurdientschas vid il tat Luis han da far cun sia lavur.

Cu el turnava dalla lavur d'uaul, vegneva el dil vitg giu ed jeu spitgavel gia o sin plattas. In fried tut special da rascha pégn e benzin da maschinas sederasava cura che jeu prendevel giu sias «gamaschas» Enqualga eran quellas bunamein scheladas.

Als tschuts che savevan buca tettar pina-va la tatta il guoter ed il tat metteva mei el pursepen culs tschuts. Jeu astgavel dar il guoter ed havevel il detg meini!

Cura che nus mavan o Valtgeva cun skis era quei in sentiment tut special che gest il tat spitgava sisum il runal ed jeu astgavel seser leu sil baun cun el.

Bia onns ha il tat purtau il cafanun ordavon alla procesiun ils dis da fiasta. Buca pauc loscha accumpignavel miu tat e marschavel sper el atras il vitg.

Il tat ei adina s'interessaus per nus biadis e persequitau cun quiet nossas vias. Ils



davos onns ha el priu pli ruasseivel. El ei adina selegraus d'ina viseta. El veva il detg cunfar cun ses sutbiadis e duman-dava adina suenter quels.

Jeu seregordel cun bia engraziament vid in tat adina cuntent e rashcuneivel. Nus vein ussa purtau el sin santeri tier nossa tatta. Aschia ein els puspei uni ella mort ed era quei fatg consolescha mei.

*Stei bein car tat da Surrein!*

*Tia biadia Mengia*

Las famiglias engrazian a tuts parents, amitgs ed enconuschents che han fatg dil bien al Luis Hendry e che han accumpignau el sin siu davos viadi.

In sinzer engraziament per las bialas flurs, cartas e donnaziuns.